

# L'Indonesia ier ed oz

## Ina bilantscha suenter la mort da Suharto

DA GUIU SOBIELA-CAANITZ

■ **«De mortuis nil nisi bene [dicendum]». Ins citescha savens quest proverbi latin che vul dir: «Dals morts astg'ins pledar mo bain». Dentant ha il magazin «The Economist» (Londra) dals 2 da favrer entitulà in artigel principal: «Epitaph on a crook and a tyrant» (p. 14). «Crook» è ina qualificaziun pauc flattusa che vul dir «scroc, canaglia, lumbardun, fraudader». Il barmier manegià, anteriur dictatur da l'Indonesia, vegn adinà numnà mo «Suharto», pia senza prenum. L'artigel entschaiva cun ils plets: «He was a despot, a cold-war monster».**

Ma paucas lingias suenter leg'ins (jau translatesch): «Suenter la mort da Suharto ha l'Indonesia proclamà set dis da malencurada naziunala (...). Colonnas umanas, lungas plis kilometers, stevan sper las vias che mainan a sia fossa da famiglia (...). Auters politichers da pajais limitrofs èn festinads tar la sepultura per prender cumià: Lee Kuan Yew da Singapore, Mahathir Mohamad da Malaisia e schizunt Xanana Gusmão, emprim mi-

nister da Timor-Leste.» Ins enlegia che politichers, per motivs diplomatics, ston savens ir suenter bara ad in scroc; tgi sa sch'i vulan era sa segirar che lez è propi mort? Ma co san fullas indonesianas undrar da libra voluntad in dictatur ch'als ha opprimids e spogliads durant passa trenta onns? «Enturn 1965 ha'l francà sia pussanza cun ina mazzacrada che ha fatg tschientmillis unfrendas (...). Suenter l'invasiun da Timor-Leste 1975 ha l'occupaziun indonesiana chaschunà la mort da forsa ina terza part da la populaziun da lez pajais (...). El ha sblundregià sia atgna patria.» Cun la-schar la pussanza 1998 ha'l savì impedir la confiscaziun dals daners ch'el aveva rubà.

### In vast pajais che basegna la vardad

L'Indonesia (222 milliuns olmas) cum-piglia passa 13 000 inslas sparpagliadas sin ina lunghezza da var 5149 km tran-ter l'Ocean ind e l'Ocean pacific. Las tschintg inslas principalas (la Java cun 129 milliuns olmas, la Sumatra cun 47 milliuns, il Sulawesi e parts da Borneo/Kalimantan e da Papua) fan or en-

semen 90% dals 1 919 440 km<sup>2</sup> dal pajais. Cumparegliadas cun la Germania (357 000 km<sup>2</sup> e 82 milliuns olmas) è pia l'Indonesia pli vasta e la Java pli populada. 88% da la populaziun totala da l'Indonesia è islamica; quai declera per gronda part l'unitad da lez vast pajais multifar. L'Indonesia è pia il principal pajais islamic dal mund. Ils tschientaners da dominaziun ollandaisa han rinfurzà l'unitad grazia al diever d'in linguatg da standard basà sin il dialect da la chapitala Batavia (oz Jakarta, 13 milliuns olmas); questa citad è situada sin la riva nordvest da Java, visavi la Sumatra. La lingua principala, numnada «Bahasa Indonesia», scriv'ins cun bustabs latins dapi il 19avel tschientaner; ils plis linguatgs da l'Indonesia, cun l'excepsiun da Papua, fan part da la medema famiglia malaica, pia sco quel da Malaisia. Suharto (1921–2008) ha tratg a niz la guerra freida, giustifitgond sias mazzacradas cun il pretext dal cum-bat encunter il communissem. El ha sviluppà l'economia grazia a l'agid da l'Occident ed als daners dal petroli. El n'ha dentant betg savì surventscher la

rebelliun da l'Aceh, provinza nord da Sumatra. Pir ils successurs da Suharto han acceptà 1999 da renconuscher l'indipendenza da Timor-Leste ed han fatg 2005 in patg da pasch e d'autonomia cun ils rebels da l'Aceh. En questa provinza è naschida 2006 ina lia (...) per ils dretgs da la dunna, cunter las fermas tendenzas tradiziunalistas da la regiun. «Il schef da la missiun da l'Uniun europea en l'Aceh, il diplomat ollandais Pieter Feith, ha fatg ina bilantscha positiva, recumandond dentant da metter ad ir ina commissiun da la vardad davart ils malfatgs da la guerra civila» (\*). Quai para in problem essenzial da l'Indonesia d'oz, e quai er areguard las atrocitads ed ils ladernitschs da la dictatura; l'artigel gia cità da «The Economist» punctuescha: «La nostalgia optimistica tar la sepultura da Suharto na sa betg remplazzar ina reconciliaziun vardai-vla, ma questa basegna la vardad istorica».

\* **Der Fischer Weltalmanach 2008. Frankfurt/Main (Fischer Taschenbuch Verlag, ISBN 978-3-596-72008-8) 2007, chavazzin «Indonesien», p. 226.**